

四庫全書

集部

欽定四庫全書

集部

雪坡集卷四十二至四

詳校官庶吉士

臣初喬齡

主事臣呂雲棟覆勘

總校官原任中允

臣王燕緒

校對官中書

臣戴衢亨

謄錄監生

臣王

翰

欽定四庫全書

雪坡集卷四十二

宋 姚勉 撰

雜著

制三首

擬宏詞作

參知政事石之端除昭文殿大學士平章軍
國兼樞密使歙國公監修國史加食邑實封

制

勅門下朕置左右而以碩輔庸鎮有邦求俊彥而迪後
人茂興文治疇咨一德董正百官敷告大庭渙敷顯號
具官某中正而純粹肅括而弘深量可包荒振河海而
不洩氣常配義塞天地而至剛直而溫簡而廉涅不緇
磨不磷圭角渾乎其弗露器宇澄之而益清夙耀郎星
已涵遠業近聯卿月愈著清華玉潤金相龍騫鳳翥肆
勤政莞密贊廟謨直方大不疑所行身能任道耆壽俊
越在厥服志在澤民重厚如勃而不至少文凝遠如環

而益堅持正具瞻師尹可謂大臣庸升上相之班兼總
元樞之政房善謀杜善斷藏諸用以彌縫蕭也規曹也
隨載斯民於清淨陞華書殿倚重經筵庸開古歛之封
仍衍真奮之奉茂昭前人之謨烈武告我后之謀猷鳴
呼均四海統百官汝其慰天下以維巖之望鎮外夷撫
諸夏汝其凝國勢於如磐之安予欲弼成道德汝礪乃
金予欲燮調陰陽汝鉉斯鼎益著圭璋之聞以收簡冊
之勲

知樞密院事管少穎除同中書門下平章事
集賢殿大學士監修國史進封宣國公加食

邑實封制

勅門下朕蒐擇英髦若稽簡牘丙魏同心而輔政漢治
以興房杜以文而濟兵唐業以創是登豪雋爰作輔臣
布告昕朝咸知朕意具官某剛健而特立敏銳而有文
早掇高科毛遂脫穎而出志輕好爵梅福掛冠而歸載
嘉恬退之風拔寘校讎之選才無施而不可道常默而

不言上而古今治亂之原悉知所自下至期會簿書之
細亦綜其詳本末兼該精粗具舉終身不易其節一毫
無欺於心越在經筵極陳治道以蕭何為刀筆之吏謂
其止漢於秦以夷吾為小器之人謂其終齊於伯論道
必先於周孔陳謨必及於唐虞詳觀小心知可大用翦
鬚賜藥欽哉無碩鼠之貪飛帛旌忠善爾有鳴鷄之度
灼見人才之皁白不搖羣議之雌黃擢自樞庭陟之亞
輔督承明著作之任黼黻皇猷兼麗正禮樂之司粉繪

王典肇開中山之國庸易管城之封申錫真腴增加峻
秩庶膺光寵益懋事功嗚呼克紹乃辟予先王朕方受
四海之圖籍勸相我家惟吉士爾其同萬國之車書還
淳風於畫卦造契之初躋至治於議禮考文之盛一心
輔治萬世有辭

吏部尚書元默卿除參知政事集英殿大學
士燕國公加食邑實封制

勅門下武公如圭璧而有文蔚著清華之望商王引金

礪以命相有資磨切之功惟邪正有薰蕕之分則君宰
不膠漆而固歷敷朕志迪簡王庭具官某極深而研幾
義方而敬直器質粹萬金之寶精誠堅百鍊之鋼自感
會於龍雲無淹藏於豹霧書氈擢第以文章行有用之
才紆綬臨民以道德洗積汙之染如石其介有玉者礪
昭然能黑白之分不使至紫朱之亂摩頂放踵而利天
下無翟子兼愛之偏研精覃思以撫羣言得昌黎鉤玄
之學擢自客卿之列置之翰苑之班播告交修出納惟

允光啟奎星之運功在凌煙之圖臣有黔夫齊可稱於
四寶僉曰伯禹堯盍錫於玄圭擢之喉舌之司典我銓
衡之選考書九品激濁揚清事判五花綜名核實薰染
人才之善刮磨君德之光歲寒知松之後凋香久與蘭
而俱化庸登政筦峻陟文階載易薛封肇開燕國申錫
圭田之奉寵升書殿之班玉我于成繩君以正嗚呼恭
而思道朕嘗夢上帝之賚予用以圖功爾其念寧王
之遺寶勿徇斜封之濫冗勿專簿書之句稽若昔召公

實啟爾土尚其夾輔庶可匹休

銘

月硯銘

桂其植兔其趨天之月孕于石為雪坡文之璧文璧其
光月宮之祥

龍尾硯銘

圓模象月鼎足類蟾是謂黠瑁灘之龍尾石嘗見賞於
雪堂之子瞻

志學銘

仰止尼山師十五志于學生知且猶爾而況我後覺勉哉立斯的知行互切磋會如顏氏子如有所立卓

虛齋銘

人心本虛惟虛則靈不物於物乃明其明有我之心苟橫於內思紛念擾斯蔽而昧已私既克欲淨理融八窓玲瓏霽月光風應物虛舟外無所忤生白虛室內靡或汙隨事酬酢周流六虛何物非我天下廣居究厥用功

本乎主一惟心之虛惟理之實

訥齋銘

巧言鮮仁惟訥則近若昔君子言訥行敏曾唯於魯顏
喟以愚默而識之其知道乎

木齋銘

剛毅木訥子曰近仁惟性固有惟質是存矧木之義於
時為春生意勃涵其仁肫肫彼葩匪華反根乃真是木
亦質於仁為親雖未盡仁亦仁之鄰彼巧令者志在悅

人匪人之悅蓋私其身是其仁心已伐厥根尚謂之鮮
聖辭之溫曷若木者弗漓其淳有美周君信厚恂恂以
木名齋得仁入門君家絳侯重厚少文尚克安劉為社
稷臣使充其質雖聖可均惜弗之學輪河之滑子今能
木於質已純所願克已以顏為倫視聽言動惟理是循
清欲如鑑弗留一塵充拓恢豁心包乾坤此木幹長由
貞復元毋止絳侯元公是尊

知非齋銘

趙君德輿謂某曰某之親友劉君少敏以知非名齋
請銘之夫知非聖賢學也今之人多藉口於蘧伯玉
夫伯玉行年五十而知四十九年非此莊語也莊語
蓋寓耳年至五十而始知四十九年以前之非敏於
學者如是哉不莊之徇而由吾聖賢之法可也作知
非齋銘

明者制念察之於幾豈必如蘧五十知非五其十年吾
生之半于此始知用力差緩聖年至此妙極知天毋謂

聖遠希聖者賢知者其真非者其偽能知其非乃識其是物格知至然後意誠意苟誠矣非何從生視聽言動四非之目以勿制非顏子之復毋止伯玉君其學顏非知之艱行之惟艱

月心齋銘

維善喻者以月婉心德明為陽慾晦則陰陰陽消長為明淺深是月本圓吾性本徹理由慾蔽明以陰缺介然有覺如月朏時進至於望有全無虧少怠操存是哉生

魄愈缺愈微以至晦蝕善養心者常如月中虛明瑩徹
不雲太空遡厥用工自致知始廣而充之大用全體詹
子泉父月心自銘願如濂溪風月滿庭

箴

懲忿箴

褊縱斯躁躁發斯暴心為氣使奚以學道粗厲猛起顛
風震霆孰若凝湛山峙淵渟顏怒不遷曾出辭氣有容
乃大有忍乃濟汝不懲忿虧中敗和去道日遠人如汝

何

夙興箴

古之聖人明德靡晦昧爽丕顯未旦已待予何人斯雖
旦猶昧保茲清明興夜未艾

趣時箴

投機之會間不容穢乘時不為將墮乃事臍弗可噬駟
弗可追事豫則立謹勿後時

積學箴

夫學猶織寸絲丈尺由賢希聖其道在積一日間斷其功必隳毋忽寸陰分亦惜之

平躁箴

大賢之度何所不容一觸而動是謂淺中汪汪萬頃撓之不濁充量以識進識以學

戒欲箴

乾男坤女大德曰生豈資汝慾而縱厥情顏如舜華何甞土芥徇慾忘身君子所戒

節用箴

施雖弗靳奉已當嗇儉雖勿固浮費當惜節用廉取可
使有餘大學生財用之者舒

改過箴

人誰無過能改則無有過弗改是謂下愚昔者顏淵過
則不貳已改於心寧改於事

贊

解星贊

一元躍躍刀截其角文字發祥秋薦橫鶚由是而往益
厲厥鋒焉用牛刀寶劍化龍

魁星贊

魁枕參首揭大有光騰蹕飛動化為茲祥俯視餘子眇
然斗量持此安施槩平四方

呂雲叔家呂僊畫象贊

僊而墨故所磨之劑成金色墨而僊故得刀圭者皆升
天回翁之玄留為家傳世之號為子墨客卿者孰敢並

驅而爭先耶

太平寺觀音像贊

妙音三界聞明鏡萬象入一切普現身巖前童子立

劉叔榮觀音像贊

劉兄叔榮得村邊鄭先生感現瑞相觀音聖像欲勒之石以施於人之信嚮大士者求善知識贊之衆莫敢當也因以遊戲翰墨三昧謾作一贊托石牕和尚寄上儻可用試饒之不則覆瓿寶祐六年春雪坡姚某贊

紫燕雙吟紅杏塢黃鸝百啞綠楊枝箇中認得真消息
露柱懷胎養下兒

琴操

友山李道士抱琴來為予作三曲請詩各為之
操

九皋

青山鬱兮白雪深四無人聲兮鶴鳴在陰聲聞于天兮
而有遐心吁嗟乎有美一人兮無密爾林

君臣慶會

衣裳治兮帝巖廊五絃歌詠兮民物阜康禹臯夔龍兮
劍佩鏘鏘吁嗟乎安得君臣兮如此一堂

觀瀾

若有人兮江之干志在流水兮必觀其瀾清風蕭蕭兮
水聲潺潺吁嗟乎世道江河兮誰底其間

文

試筆因成

是筆也南昌賀發之所造也發以筆名聞自昔矣暇日友人攜筆以遺且曰珍之平生將不廢其用因以廬陵羅燮之墨試之紙潤而光皎字峭而體勁果非劣毫者客乃問曰筆之初也始於蒙恬乎曰未也曲禮有史載筆之語周公有援筆寫龜圖之事莊子有舐筆和墨之說則筆之為筆其來久矣不始於蒙恬也雖然此不必論也即筆之功用而言之可也嗚呼用於鍾王顏柳之徒而春蚓秋蛇浮雲驚龍名重天下矣用於愷之摩詰

之流而馳譽丹青陶鎔物態號稱絕世矣五色於李嶠而為真才子生花於太白而才思逸贍矣用於古人其功如是我而用之必猶今之視昔也將見重於千鈞過於飛泉六草三真偉後超前或靜几明牕春日舒長含情凝思欲篇欲章則必輕妍其管健逸其毫應吾心思之洋洋豸冠而揖側堦而立記言與動書佞與直則必隨心應手驚風走雨助吾英鯁之翼翼寫列女傳勒磨崖碑再拜獻文精神怡怡則必龍虎騰拏妙奪春芬使

吾過於元而高於虞中書日處萬務來去應機酬酢風
雨霜露則必助吾英斷炳吾神判使吾先於房而邁於
杜名遂功成投簪謝纓山觀水游風哦月吟則必滌吾
塵懷暢吾幽情使吾食朝霞而跨白雲隨時所適任意
所如縱橫震耀各得其妙豈止前數子而已邪客曰善
然則將何而用之曰藏以待時俟價而沽不特封之管
城而拜之中書

精舍名犬

精舍未有犬為防丐諸鄰而得之欲以名呼焉命之曰學虎學虎之義有二欲其為吾精舍之虎也欲其學虎之威以御暴客也或曰畫虎不成反類於狗狗不可以比虎也予曰不然畫虎而類狗固不可名狗而比虎奚不可名以此固可以見吾精舍之地雖養狗亦如養虎也亦可以見吾精舍之人其馴虎必猶蓄狗也何不可之有哉於是寫餒于槽投骨于地呼學虎而命之曰汝犬也而名汝以虎要當如鶩之晞驥可也是必視如虎

之眈然吠如虎之闐然步如虎之安然蹲如虎之昂然
夫如是則伏而鼪鼪使之不敢畫而趨屏而狐狸使之
不敢宵而啼穿窬之類息心肱篋之夫遁迹使吾精舍
之人居有旁護行無後顧汝學虎之功也汝當學虎之
威嚴而不當學虎之暴而饒汝當學虎之深居而簡出
不當學虎之鬪勇而衝突吾不願汝秉識含靈墮虛無
穽而為趙州之有佛性亦不願汝舐鼎食丹入幻妄闕
而為淮安之吠雲間吾不願汝逐鷹兔而為斯之牽黃

亦不願汝執虎豹而如穆之來白吾不願汝為韓之盧
亦不願汝為宋之玃吾不願汝為華之猗亦不願汝為
旅之獒嗚呼汝其能以力報主遠為書郵如黃耳乎抑
能以義戀舊從遷隨返如烏喙乎其能銜骨而獻馘乎
抑能保金而不去乎其能忠君而不食乎抑能以仁而
哺異雛乎使厖者固不可不吠而能詩之客來山林則
又當如何將軍之出迎也習麋固不可拂主人意而功
名之會鼎至則亦不必為魏元忠之家怪也謹無溺井

而齧人于門以制人口舌謹無驚越之雪而蒼黃吠噬
以召閹取喧謹無以尾續貂而亂真偽謹無身服繡罽
而啓僭奢謹無効桀暴而吠仁堯謹無聽晉嘖而搏宣
孟謹無以一食之怨而挾憤以殺客謹無以一饑之迫
而懷饕以舐砧謹無竊秦宮之裘而甘為盜之名謹無
効盤瓠之僭而化荆蠻之俗能如是則可以稱是學虎
之名矣虎亦且不汝狗若矣汝有功於主人如此他日
主人學優而仕當清其政刑遠屏攘敘使汝之樂於卧

花陰安於生足麓也以是報汝今名汝以學虎尚有以稱其名哉於是學虎搖尾如喜拜足如謝而去

檄

檄諸鄉教民兵築山寨文

本朝之化感人心久被海涵之澤普天之下皆王土誰無星共之思惟天意必福中華而人和斯有地利用弘不論爰激羣忠上報三百年之國恩下全億萬姓之民命仰皇家之仁厚待邊裔以寬容致彼干誅敢於犯順

然而佛狸窺宋第足彰送死之愚苻堅寇淮適自促喪
邦之禍彼何足畏我貴自強彼驅吾民為先鋒既每有
倒戈之患而提孤軍入重地又徒成入甯之擒犯兵忌
而不知料敵情之易敗吾知其無能為矣天亡之其在
此乎願易茲畏敵之情而作此鼓勇之氣與其散之四
方而各失其生聚孰若同此一心而自足以扞防教民
可以即戎有備自能無患守土封疆城郭全為效死弗
去之謀設險山川丘陵合為以全取勝之計宜依山而

築寨庸衛國以護民貧富相資主佃相養用古者寓兵於農之意以時乎教戰於守之中外而屯內而耕各有攸處攻則勝守則固何憚不為道德之威成安強仁義之師敵節制若使一庶邦之衆志是增幾百萬之勝兵官不調丁無天寶石壕之吏人能被甲即成周井畝之軍隱然虎豹之在山驅爾蠱蟲而出境軍容整肅國步清安遠消朔漠之埃氛密絕潢池之萌蘖莫良此策明聽斯言朝家旌敵愾之功信如金石史冊紀安邊之事

炳若丹青各堅忠義之忱勇赴功名之會故茲檄告咸
請通知

雪坡集卷四十二

欽定四庫全書

雪坡集卷四十三

宋 姚勉 撰

文

西澗書院換新梁文

壬子

伏以習先聖之術當為道閫之棟梁育天下之英要作
明堂之柱石惟是扶顛持危之日則知致遠任重之材
平時學校之規模一旦廟堂之力量作新氣象聳動觀

瞻仰鄉國之三劉凜風標於百世誦涪翁清潁尾之句
天畀節之獨全讀歐公廬山高之詩地以人而愈重或
對面而攻介甫或褰裳而去蔡京鐘鼎一邦冠冕四海
所以北山之名子創為西澗之書堂欲後學之得師企
前修而接武自興此地益振斯文道學立已之要端士
皆知本科目進身之餘事歲不乏人聯翩登天府之書
陸續擢太常之第以至賢關之俊士競蜚帝學之英聲
前者既着鞭而爭先後者又積薪之居上而況地靈標

異天秀發祥鳳沼波澄春色動墨池之水雁塔雲立晴
霄崢文筆之峯中間一水之橫陳南北萬山之雄峙氣
類聿新於感召英髦皆萃於游歌誦詩讀書吾伊之聲
相接進德脩業挑達之習不萌黽勉乎學問思辨之功
講明乎脩齊治平之事有資涵養必大發揮矧居多脩
泮之魯侯且代有教湖之安定儒林風動黌舍日新欲
增賀燕之歡聲乃易脩虹於傑宇使工師求大木喜得
四十圍溜雨之根柯立館下招諸生便有千萬間連雲

之氣槩異前此撓柔之無力知其中負荷之有人棟橈
無將壓之形松栢屹後凋之操作興如是證應有開時
當詔歲之肇端士與王春而更始陋者昔而今於壯此
泰亨剛長之符捨其舊而新是謀乃革變文蔚之象必
有勝仁重器扶世長才驤龍首而奮九天沛滂霖雨斷
鰲足而立四極撐拄乾坤仰挹鄉先生之流風益厲大
丈夫之壯節不虛此應會見若人匠石告成兒郎贊偉
東東上天京路喜通昨日飛僊橋已建連河識屬采

芹宮

西西澗高風要與齊利祿毫輕名節重鳳凰寧作飽
蟲雞

南南有荷山翠潑藍雲際塔尖文筆聳棘闌楓陞占
魁三

北北斗魁躔堪手摘瑞陽人要瑞朝廷太史預占雲
五色

上上徹文章光萬丈个中人有棟梁材須信書堂真

隱相

下下為生靈上宗社道非小用豈謀身普與萬方為

廣厦

伏願上梁之後學顏志尹家稷人臯由德行之科而冠
國家進士之科修仁義之爵而得公卿大夫之爵先覺
覺後已立立人與賢師良友以切磋皆由體達用之學
得明王聖主而輔相收致君澤民之功大節終身香名
萬古

惠政橋上梁文

士子

伏以造舟為梁已閱數百年之古橫江立石又為千萬
世之規莫驚濤駭浪之衝屹砥柱中流之勢一新壯觀
夙掩前聞州曰瑞陽江如濯錦人卧船流露團鶴起供
名筆之畫圖溪從城過山到市平入當家之詩句接通
衢之聚市列橫艦於浮津在南唐時畫鷁蠹靈祠之下
至東都日彩霓飛道院之前嚴公之誌刻尚存蘇僊之
詩史可攷然當春夏久雨之積適為川谷百流之交巨

浸稽天小舟斷渡河既難於填鵲民或至於為魚居人
病之仁者念此於是前判府宮講編修經其始今判府
寺丞吏部遂其成立非常之功必待非常之人偉哉器
宇建無窮之基亦有無窮之聞深矣恩波廣鄭子產濟
人之心見蔡端明利民之志既仍舊貫復就新規費博
而民不知工鉅而役則簡神人驅石丁士鑿山不日成
之如天造此過洶湧奔流之注負瓌偉絕特之稱鰲頭
擎玉閭之峯鎮臨波上龍脊截銀河之水來下人間力

障倒瀾而東之勢若運溟而南適海藏忽呈於貝闕沙
洲驟擁於鼉城利涉大川卓為巨鎮二千石治理效於
此可觀十二月興梁成方茲更劣豈特永往來之利又
將增形勝之雄據彩鳳之上游挺蒼龍之左角迴山若
抱界水不流而況津號飛仙宮聯貢士既作新於地脉
必奮發於天荒識協河連即驗狀元之出象如堤築預
符宰相之行此役之興所關者大僉言太守鑿石而立
三犀必有丈夫題柱而立駟馬載洧穀旦肇建中亭式

舉脩梁敢陳善頌

東穩駕橫天萬丈虹市與河連佳識合掄魁應在錦

城中

西遠過秦人鑿石犀橋立富平元凱力坡仙遺愛滿

蘇堤

南天筆峯高碧玉簪橋與棘闌相映帶龍頭躍出浪

層三

北西市相通紅紫陌任渠風雨撼波濤鰲足拄天常

不反

上玉脊鯨鯢橫翠浪高車駟馬錦還鄉自有相如題
筆壯

下鐵鎖長開燈火夜往來人喜就橋安鎮定此邦如
泰華

伏願上梁之後迅流中立實地上行山負夸娥之靈水
鎖支祁之怪民安磐石士奮亨衢居是邦者化鯢鵬而
問天津仕茲土者駕蚪螭而上霄漢新栽官柳一條大

路朝天勿翦甘棠千古長橋枕水

桂殿上梁文

乙卯

伏以魁三台之呈象比比相承山七曲之妥靈洋洋如在
在創英祠而徼福擢峻第以聯芳恭惟元皇仙帝造化
大鈞儒流司命捫參歷井肇開真王爵土之封絡壁聯
奎獨秉天下文章之柄權衡才德劑量功名自選舉以
至於公卿凡祿位皆歸於工宰無往不在水脉行乎地
中有開必先雲彩呈于日下瞻言新瑞秀比潼川愛鳳

山錦水之皆同飛鸞駕雲輶而來降式開異夢爰卜真
棲我同志用協羣工肇興祀宇適際賓興之歲聿資主
倡之功拔鯨牙而酌天漿發揮壯氣驤龍首而集霧雨
超軼先驅桂籍浮香柳君染汁共登金馬同趣黃扉十
年三度之狀元初何難事四海九州之宰相總在吾邦
鼎建脩虹豫驩賀燕

東文氣高橫萬丈虹昨夜鳳山高處望魁星又現五
雲中

西千佛聯名桂籍題足下青雲生步武不妨攜手共
登梯

南七曲神仙此駐驂桂殿岌崑雲表立錦江相望府
潭潭

北映日重開雲五色君恩增貢例新成從此渾花騰
增額

上好事鼎來乘氣旺倫魁出了又倫魁宰相後來重
宰相

下燕雀驩呼萬間厦陽和一點散人懷收拾洪纖歸造化

伏願上梁之後異人間出盛事交輝琳宮之香火綿長
甲科之衣鉢傳續父子則梁顥梁固兄弟則堯叟堯咨
師友則如張之汪朋儕則若胡於呂以高科第立大功
名姚姒致君伊周佐治重趙九鼎作米一經破西賊者
天聖之廷元平淮蔡者元和之進士有光于昔其在斯
今自岷峨來古筠已窺帝意為國家清蜀道方契神謀

吾黨勉旃斯文幸甚格天事業蓋世功名

天香閣上梁文

伏以冠天北闕之立班曾叨誤渥就屋東偏而建閣庸
貯醲頌永茲家世之傳期我子孫之繼睠惟吾祖肇建
此堂于廷尉之門閭要容駟馬王晉公之第宅久種三
槐昔先人期望之甚深我小子紹承之敢怠謬膺獨對
幸足三魁九萬里扶搖已快徙溟南之運千萬間突兀
方為庇天下之圖敢期先志之已酬尚冀後人之相續

家傳龍種池有鳳毛俾學於斯庶齊厥美紫帽簷垂雪
鞭絲裊先沾天陞之香綠袍恩重黃榜墨鮮更看煙樓
之過相承忠孝上報君親式舉修梁交騰善頌

東皎月朝升萬丈紅日與長安天正近心馳魏闕五
雲中

西桂娥猶記夢中題龍頭信有親傳種前是嚴君後
是兒

南雁塔霄崢碧玉簪書在城南符可讀犁鋤中有府

潭潭

北吾家已有張師德讀書正要濟時艱出與明堂為
柱石

上阿固須如郎罷樣狀元還是狀元兒更要相門重
出相

下燕雀交歡知賀厦吾寧無地起樓臺一念常思庇
天下

伏願上梁之後安于仁宅出自禮門與黜唯參相傳聖

道前周後魯俱拜君恩世科首龍虎之登勲業侈麒麟
之紀一家功業萬古聲名

賦梅樓上梁文

伏以無地起樓臺固願學萊公之事有園秀花木亦當
希涑水之賢未甘走朝市之紅塵共要飽溪山之清興
稍堪寓目庶早抽身雪坡主人鷗鷺舊遊麋鹿真性初
賜集英第也曾看杭州十里之花不上光範書未忍拋
錦江一絲之竹惟童子之釣所有先人之敝廬占山水

窟宅之中足泉石膏肓之趣隱者盤旋於幽阻雖得於
天君子眺望乎高明尚虛其地恰有坡而宜雪聊鋤月
以種梅中建一樓下臨萬象雲屏洗雨納層巘於簷楹水
鏡涵天挹明湖於樽俎錦千花之步障碧萬竹之油幢
吟紅藥對紫薇靜綸閣文書之意思撫蒼松摩翠栢屹
明堂梁棟之觀瞻雖無輪奐之翬飛是亦園池之要會
然命意不輕於取物而扁名獨美於賦梅見賢思齊論
世尚友若廣平之顯唐室至文正之名我朝卓然英概

之不羣皆以此花而寄興語雖婉媚何害為鐵石心腸
志不飽溫已預占鈞軸事業儼相望而玉立均不辱於
冰姿凜若猶生希之則是願堅持於勁操初不尚於浮
榮先天下春儲萬斛香本為盛事開雪裏枝回孤根暖
方見清標古人實獲我心天下莫非吾事登斯樓也初
無貯妓女藏歌舞之奢適我願兮端有砥節行厲蘄隅
之益窮達俱存生意榮華不趯春風白玉堂如茅舍竹
籬黃金鉉在霜崖冰谷巡簷索笑誰知先憂後樂之心

看影忍寒不動炙熱趨炎之想庶倚欄而無媿堪把酒
以相看而況陰盡陽生機融剝復仰觀俯察中有乾坤
覺仁意之默存愛生香之不斷坐中客滿應有能同飲
冰餐雪之盟門外人看未必不作齊雲落星之誚木斷
而已人謂斯何聊復上梁不妨贊偉

東海外連雲萬丈松嘉味儘堪和傅鼎清標元不浣
秦封

西野色團雲萬竹齊中有雪坡精舍在讀書聲到曉

牕雞

南釣月橫舟在碧潭小樣西湖共宴賞荷花晚日照

紅酣

北括栢豫章森黛色个中有柱可擎天盡日憑欄為

憂國

上俯看園林春萬象夜深引手挾天河欲洗人間腥

海浪

下踏月看花飛雪夜政令天上玉為堂只似水邊茅

作舍

伏願上梁之後癘仙長健俗客不來臥人豪百尺樓平
吞湖海勸梅花一盃酒共保山林斷不連甲第於雲霄
且預占午橋之風月賢者樂此何妨為橫水孤舟時則
為之也會作撐霄巨棟稱天此景重地以人希文已做
堯夫更為尚期子以繼承之事韓公所無樂天則有記
請身於強健之時倘負此梅有如皦日

秋山上梁文

為謝飛卿作

雲霄萬里未甘為求田問舍之謀風雨數椽聊以遂作
室肯堂之志詎敢謂千萬間之突兀亦幸免三十年之
辛勤此屋無華其人或可秋山主人胸中丘壑筆底菑
畲臥百尺樓少亦有元龍之豪氣築一區宅吾將草子
雲之玄文種孤梅於荊棘之叢餐晚菊於煙霞之表以
浮雲視不義之富豈誇地上之流錢謂黃金劣教子之
經自信書中之有屋雖先人之廬猶足以庇然舊宅之
囂不可以居經之營之不日成之合矣完矣曰苟美矣

暑軒涼而冬室燠畫牕明而夜堂深砌宜芝蘭園可花
竹綠水護田青山排闥地無一點之塵埃碧桃種露紅
杏栽雲春占四時之富貴暇則整安石東山之屐時乎
得靈運西堂之詩旁聯花萼之新不出粉榆之舊挿三
萬軸籤於鄴侯之架且要有子讀書種五十畝秫於淵
明之田未嘗無客飲酒固已自滋蘭九畹也不妨植橘
千頭烹羊炮羔以供歲時彈琴著書以娛朝夕境與人
而俱勝屋於我而有餘時未可為姑且抱臥龍草廬之

滕志如得遂亦能容駟馬高蓋之車修梁肇舉於長虹
吉語式殫於賀燕

東宅枕秋山第一峯安石會稽非素隱蒼生都寄此
山中

西門外車多聽馬嘶要識主人心地處晚涼新月浸
潭溪

南四里名岡意可探自有晞顏真樂在羸金積玉不
渠貪

北萬仞荷山呈翠色夜深斗柄揭天寒魁第一星光
可摘

上從此肯堂基址壯等閒跂翼接雲飛振起家聲天
所相

下玉樹芝蘭相照射吾伊日聽讀書聲文脉要如前
後謝

上梁之後萃一家之和氣衍五福之慶源丹桂浮香日
熟義方之訓三槐驚蔭天開世德之符姑少俟之必有

興者

雪坡集卷四十三

欽定四庫全書

雪坡集卷四十四

宋 姚勉 撰

長短句

沁園春

太學補試歸塗作

錦水雙龍鞭風駕霆來遊壁池有一龍躍出精神電掣
一龍戰退鱗甲天飛一樣軒拏殊途升蟄造化真同戲
小兒時人眼總羨他騰踏笑我卑棲促裝且恁西歸

信自古功名各有時，而今莫問誰強誰弱。只爭時節，
來速來遲，無地樓臺有官鼎。鼎命到亨，通事事宜。三年
裏看龍頭獨露，雁塔同題。

賀新郎

京學類升時作

劍吼蛟龍怒，問天天、功名兩字，幾時分付。生箇英雄為
世用，須早青雲得路。却底事、知音未遇，兩度入天飛折。
翼謾教人欲嘆，儒冠誤，竟不曉是何故。休休也，無憑
據。有如椽、健筆蟾宮，須還高步。若使長材終困，躓社稷。

教誰扶助信淺水留龍不住萬頃碧流通大海向波濤
濶處興雲霧須信道這回做

賀新郎

京學類升後作

長嘯山中臥嘆從前二十年來因循空過自是惺惺并
了了奈這五行尚左遇好事許多磨挫浩蕩醉鄉狂
莫檢筭傍人笑得唇焦破誰信道只恁麼從今牢把
江湖施要做些勲業歸來則今不見彭余朱李輩摠是
白身人作震耀得聲名許大萬一老天青眼顧又何難

印佩黃金顆時來到也還我

霜天曉角

湖上泛月歸

秋懷軒豁痛飲天機發世界只如掌大筭只有醉鄉濶
煙抹山態活雨晴坡面滑艇子慢搖歸去莫攪碎一

湖月

沁園春

送友人補太學

一部周官學問淵源山齋得來最雄姿直氣不塗脂粉
仙風道骨不沈塵埃萬里青雲相期濶步底事向天門

折翼回君知否這白衣御史卿相胚胎 時人休用驚
猜機會到功名節節催看蒲質易彫何如松茂菊花已
老須是梅開萬事何難時來得做且信天工次第排從
今去願徑遊璧水直上蘭臺

賀新郎

及第作

嘗不喜舊詞所謂宴罷瓊林醉遊花市此時方顯男
兒志以為男兒之志豈止在醉遊花市而已哉此說
殊未然也必志於致君澤民而後可嘗欲作數語易

之而未暇癸丑叨忝誤恩方圓前話以為他日魁天下者之勸非敢自銜也夫以天子之所親擢蒼生之所屬望當如之何而後可以無負之哉友人潘月崖首求某書之是其志亦不在彼而在於此矣故書不敢辭是年一陽來復之日姚某書

月轉宮牆曲六更殘鑰魚聲亮紛紛袍鵲黼座臨軒清蹕奏天仗綴行森肅望五色雲浮黃屋三策忠嘉親賜擢動龍顏人立班頭玉臚首唱衆心服 殿頭賜宴宮

花簇寫新詩金牋競進繡床爭
感御渥新霑催進謝一點恩袍
先綠歸袖惹天香芬馥玉勒金
韉迎夾路九街人盡道蒼生福
爭擁入狀元局

沁園春

壽同年陳探花

憶昔東坡秀奪眉山生丙子年
蓋丙離子坎四方中氣宜當此
歲間出英賢河嶽重靈星辰再
孕來自赤城中洞天新秋霽萃
一襟爽氣風露澄鮮玉階同聽
臚傳伴寶馬如龍絲裊鞭正椿
庭未老同躋榮路萼樓爭耀

相照魁躔即似坡公金蓮夜對身作玉堂雲霧仙憐同
歲但乞如夢得分買山錢

賀新郎

送楊帥參之任

唱徹陽關調伴行人梅拂征鞍曉霜寒峭金甲雕戈開
玉帳樽俎風流談笑看策馬從容江表自是藥階苔砌
客卷經綸且泛芙蓉沼襟量濶西江小允文事業從
容了要岷峨人物後先相照見說君王曾有問似此人
才多少便咫尺雲霄清要四世三公羶復舊况蜀珍先

已登廊廟但側耳聽新詔

念奴嬌

和尹司門與蔡侯詠雪

貂裘夜冷怪地爐煨酒經時難熱曉起盤風天舞絮拍
手兒童歡悅客裏新吟天葩翦巧思與梅爭發使君屬
和雪花同是三絕未說賦就梁園陽春拍調壓倒唐
元白早晚聯鑣花底去共看朝霞銀闕朝退歸來清虛
堂裏醉酒淋漓墨而今且對聚星堂上賓客

沁園春

壽婺州陳可齋九月七日

四海中間第一清流惟有可齋看平生踐履真如冰玉
雄文光燄不浣塵埃元祐諸賢紛紛臺省惟有景仁招
不來狂瀾倒獨中流砥柱屹立崔嵬掛冠有請高哉
但清廟正需梁棟材便撐舟野水出航巨海有官鼎鼐
無地樓臺製菊齡高看萸人健萬頃秋江入壽盃經綸
了却馭風騎氣闌苑蓬萊

滿江紅

壽鄧法曹

仙苑蟠桃恰則是而今初熟王母遣飛瓊捧獻絳金紅

玉笑把九霞鸞鳳竿滿斟七寶蒲萄醪為長庚此日自
天來慇懃祝 仙子唱長生曲仙客獻長生籙活千人鄧
禹陰功俱足五鶚早呈公府剡萬羊自有中書祿更從
頭安享八千年人間福

沁園春

壽張府判夫人

梅笑東風只兩日間又新歲華有玉龜阿母獻三蟠實
藥宮仙子飛七香車春滿蝦簾雪晴鴛瓦牕戶非煙籠
翠紗萱堂上看衣翻戲綵觴捧流霞 君家先是仙家

幾度看菖蒲九節花來劒池丹井平分風月一溪流水
猶泛胡麻壽慶千秋榮封兩國綠鬢猶深楊柳鴉長生
藥在蓬萊頂上不必丹砂

水調歌頭

壽趙宰

桃李河陽縣春又到花枝先庚三日鰲山晴雪放燈時
金宿爭華玉婺來入仙閨清夢光動綉湖西人物東都
令句法晚唐詩 兩年春三種異十般奇朝天近也紫
泥催起鳬鳬飛總羨童顏綠髮榮綰金魚玉帶日侍赭

黃衣來歲傳柑宴人在賞花池

水調歌頭

壽趙倅

微雪弄新霽寒月上初弦長庚入夢間生采石錦袍仙
分得天孫雲織掣斷麒麟金鎖來自玉皇前丹井凭泥
軾風月興無邊 詔書來催入覲占春先柳邊花底細
騎輦路響鳴鞭榮侍金鑾殿上更向沉香亭北半醉拂
華箋來歲今朝裏人在八花磚

滿江紅

送郡守美任

萬里西風吹送到五雲鸞紙催促文章太守入朝花底
清節高橫秋一片仁風散作春千里漾恩波溶泳錦江
中深如水難臥轍留行李但側聽星辰履看麒麟案
側即催榮侍紅藥香中翻詔草紫薇影畔裁詩綺更宸
旒已自覆公名金甌裏

沁園春

送權倖許張幹

萬里清風吹送錦帆入南浦雲看拂天旌旆攀留不住
迷津舸艦歌舞相迎二許家聲三洪地望今代風流第

一人蜚英早合詞林視草書閣翻芸 飛芻遠餉三軍
特借作紅蓮入幕賓把西山暮雨暫時收捲荷山明月
小試平分甦醒枯魚剔除深蠹箇是人間有脚春難淹
久看詔催入侍香案麒麟

水龍吟

癸丑五月致政生日在京作

菱荷香雨初收竹風槐日涼清曉年年祝壽今年更比
常年時好教子收功五雲金殿初承親詔早臚傳三日
壽稱千歲多應是如公少 遙想壽椿堂上飲霞觴捧

孫微笑已見兒榮更看孫貴茅分蒲召上第歸來綵衣
挂綠蘭階生耀九霄中一點光明壽星高照

沁園春

七月朔壽盧守

一葉新涼又是西風吹轉素商攬玉壺英氣鍾為人物
銀河精采融作文章司巧天公攬先七夕分付天孫雲
錦裳騎龍鳳自九霄飛至萬丈光芒 早年奏賦長楊
飽挹盡瀛洲風露香問石渠天祿借將班馬荷山錦水
暫作龔黃藥省春風薇垣夜月令佩僊花侍玉皇明年

裏飲壽椒何處宣勸持觴

沁園春

壽陶守

鶴髮鴉髻歡捧霞觴酌丹井泉慶湘山峯頂飛來古佛
劍池洞裏活底神仙春雨慳時千金斗粟民仰使君為
食天公知否只活人陰德合壽千年寶猊香噴沉煙
環艷翠明紅擁壽筵最一般奇特鳳雛新貴斑衣綠綬
光彩相鮮帝命師臣欽哉有子飛詔看看又日邊黃封
酒到明年今日中使傳宣

沁園春

壽王高安七月二十八日

超逸天才文如三松詩如廬溪自白蓮賦就已高聲價
梅花句出遠見襟期玉麈精神瑤林風韻雪裏神仙
小氅衣緱山夕已再經旬浹戲鶴重歸花間鳬舄輕
飛便一似元規報十奇最風流膝上雙親未老三槐手
種分付佳兒又想夷吾帝恩王某鈞軸舍人知未遲長
生藥在玉盤麟脯瓊苑蟾芝

沁園春

壽楊帥參十月生次日子之官

摘玉藥梅泛金葉蕉祝公壽齡筭今年比似常年賞別
翠煙紅霧香藹門屏鳳詔雲霄龍光牛斗輝射南州孺
子亭看看是伴元戎小隊花柳郊垌傳家有子明經
渾不要黃金遺滿籬向月中傳與一枝仙桂襴斑衣上
更著袍青明日瓜期今朝椿壽好醉芝蘭玉樹庭公知
否老人星一點映泰階星

賀新涼

送易子炎運幹之任

冷眼三邊處喜舍人水濱躍馬上京西路三國英雄千

載矣形勝依然如故這勲業向誰分付袖裏翰林風月
手也何妨戮力風雲護談笑暇詩吟過峴山幾載無
人顧幸如今剪除荆棘掃清颶霧換得東南新局面政
欠十分著數算人物須還羊杜玉帳籌邊機會好把規
模趲出中原去天下事書生做

沁園春

壽程丞相

崧岳降神昴宿宣精挺生偉人整淳祐乾坤浸如嘉祐
太平事業了却端平扶日中天拱辰北極一洒甘霖埃

霧清春寰海聽農歌載路邊
柝沈聲旂常萬世勲銘
便與國無窮垂令名似青山
流水涑川賢相黃花晚節
魏國元臣五緯芒寒六符色
正輝映老人南極星蒼生
福開八荒壽域一氣洪鈞

沁園春

壽賈丞相

章武中興淮蔡欲平晉公已生
信天生英傑正為國計
擎天著柱要自支撐萬里長江
古稱天險去歲裏風濤
忽震驚公談笑把雲腥霓翳
一日都清歸來奠枕于

京有輝煥明堂前一星稱衮衣廊廟楓宸眷寵綵衣公
府萱砌春榮著片公心辦雙明眼長與羣賢扶太平無
它願植萬年宗社萬古功名

沁園春

壽陳中書

湖海元龍逸氣飄然可百尺樓愛文光萬丈星辰絢彩
爽襟一掬風露澄秋銜字水清班心玉立海內而今第
一流緒書了紫薇花浸月夜攬詞頭 著身已是瀛洲
間更有長生別藥不是生來已帶神仙道骨毫端自有

富貴封侯拜賜黃封承恩青瑣見說香名又覆甌從今
去了福公事業從赤松游

沁園春

壽趙倅

道骨仙風海上騎鯨端是後身把銀河天巧鍾為文采
劍津寶氣融作精神壺玉儲冰掌金擎露胃次全無一
點塵年年裏早花朝六日長慶生申 簾篁濯錦江濱
人盡道如公清最真合沈香亭北金牋奏曲恩披獸錦
醉拭龍巾泥紫頰來梁黃飛去自是八花磚上人從今

後看大鈞播物萬象皆春

沁園春

餞張倅

明月扁舟輕逐江鷗翩然賦歸任顛風掀舞濤山浪屋
少須平定一碧琉璃柳絮浮雲有無根蒂到底不磨真
是非呵可笑笑人情似紙世事如棋宜堂事事皆宜
把杯酒論文更有誰記風雲滿席吟情浩蕩龍蛇滿壁
醉墨淋漓別後相思有書寄否春在梅花第一枝重相
見約柳堤撐舫竹閣尋詩

沁園春

送友人歸蜀

拂劍整裝光射紫霄斗牛色寒大丈夫不作兒曹離別
何須更唱三疊陽關畫錦還鄉油幢佐幕誰道青天行
路難從今去聽聲名燄燄飛動岷山 征逐少飲加餐
要做取功名久遠看捲長風吹醒劍閣雲氣更須砥柱
三峽驚湍聞道槐庭已登安石此去須彈貢禹冠明年
裏踏梅花有分相見長安

聲聲慢

和徐同年梅

江涵石瘦雪壓橋低森森萬木寒僵不是爭魁百花誰
敢先芳冰姿皎然玉立笑兒曹粉面何郎調羹鼎只此
花餘事說甚宮粧松竹歲寒三友恨竹汙晉士松浣
秦皇雪魄冰魂回首世上無香西湖有人覓句但知渠
清淺昏黃奇絕處五更初裏橫月帶霜

柳梢青

憶西湖

長記西湖水光山色濃淡相宜豐樂樓前湧金門外買
箇船兒而今又是春時清夢只孤山賦詩綠蓋芙蓉

青絲楊柳好在蘇堤

賀新郎

憶別

薄晚收殘暑嘆西風暗換流年又還如許鴉背斜陽初
斂影雲淡新涼天宇人袖手闌干凝竚鄰笛喚將鄉思
動聽愁聲又入梧桐雨秋到也尚羈旅故人只在江
南渚想應嫌久戀東華軟紅塵土寄遠裁衣知念否新月
家家砧杵魂夢想驚黃金縷雁影不來天更遠寫書成
欲寄憑誰與知客恨兩蛩語

賀新涼

程秋幹席上作

牕月梅花白，夜堂深燭搖紅影。
綉簾垂額半，醉金釵嬌。
映座寒處也，留春色深意在四絃輕摘香塢花行聽啄。
木翠微邊細落仙人屐，星盼轉趣嬌拍。
人間此手真難得，向樽前相逢有分底，須相識。
愁淺恩深千萬意，惆悵故人雲隔，怕立損弓鞋紅窄。
換取明珠知肯否，綠牕深長共春憐惜，休惱亂坐中客。

妓喚惜善琵琶

雪坡集卷四十四

欽定四庫全書

集部
雪坡集卷四十五至
七

詳校官庶吉士臣初喬齡

主事臣呂雲棟覆勘

總校官原任中允臣王燕緒

校對官中書臣戴衢亨

謄錄監生臣王翰

欽定四庫全書

雪坡集卷四十五

宋 姚勉 撰

樂致語

郡守勸駕樂語

代作

大比興能荷嶺萃多才之盛嘉賓式燕芝堂列四座之
英秩秩初筵津津喜色省元學士工磨月斧巧織雲裳
經學淵源派接廬山之舊詞華藻麗燈傳渤海之遺藉

甚月評偉哉時望蜚聲米廩一鶚橫空較藝棘闈八龍
得雋天族倍七賢之盛星臺聯三秀之榮桂子香飄共
登秋賦梅花信早齊報春魁我判府六館俊流雙旌間
氣義交得趣密傳家學之精佛閣題名早繼世科之選
元是蓬萊之佳客來為道院之主人適當勸駕之初大
舉吹笙之禮府判黃石高弟梓潼後身檄捧星臺心授
文章之印書題天姥手提人物之衡竚看北闕之軒騰
盡是東君之吹送玉京馬蹄疾齊觀上國之光錦水市

河連好應倫魁之識輒呈口號上奉清歡

主人合作紫薇郎引領羣仙覲玉皇滿袖風雲生羽
翮排空牛斗避光芒錦江家識聲名在金榜魏科姓
字香典貢春官來歲事芝香趣下瑞芝堂

新婚致語

鄒娶陳

新陽七日已欣寒谷之回春和氣一天快覩德星之聚
夜艷神仙於華屋秩籩豆於初筵喜色盈門歡聲溢座
恭惟嘉賓上舍學士太丘德宇拾遺文章傳家有狀元

之榮宰社見宰相之志裏首奮翼合直上於玉堂吐氣
揚眉即橫飛於壁水相攸慶燕得婿如龍舉鍼子送女
之儀結女叔來聘之好次賓學士中庸世學安定家傳
謝砌玉芝竇庭丹桂曾快鶴書之捧即榮蟾窟之遊協
諧卜鳳之祥整頓駟鸞之駕在座親賓晉秦懿戚劉范
世姻綸巾公瑾之風流錦衣買臣之富貴導引得仙遊
之樂笑談開釀禁之嚴高朋雲集於玳筵雅論風生於
玉塵我東道朝奉道鄉直節齊國高才子舍聯輝五鳳

之羽毛絢爛孫枝挺秀八龍之頭角崢嶸欲早見於曾
玄乃榮聯於姻好卓以西雍之人物副茲東坦之聲名
榮遂結褵同諧合卺鳳駢鸞駕月宮擁仙子之來龍燭
鴛屏雲漢慶星郎之會大開宴席永締歡盟愛日烘晴
祥煙藹曉松耐挺歲寒之節梅嬌漏春信之香歌遏行
雲舞翻回雪祥光院宇今年小慶於登科喜色門闌來
歲聯看於升舍某廁身樂部拭目清歡欲展心私上呈
口號

珠簾綉幕藹祥煙
合卺嘉盟締百年
律底春回寒谷
暖堂間夜會德星
賢綵輶牛女歡雲
漢華屋神仙艷
洞天玉潤冰清
更奇絕明年聯步
璧池邊

對廳樂語

丙辰春再娶

韶天明麗慶人月之重圓
魁宿熒煌聯使星而高會
新鳳鳴之諧叶隆燕衍以
綢繆西位郡馬上舍邦國
故家道鄉雅望名蜚璧水
咸推天子之門生身娶瑤
姬自是人間之禁脔早具
龍頭之眼親調麟角之膠
苗夫人不

識韋臯俗何足怪相里氏皆輕杜衍君獨不然力主嘉
盟遂脩前好次位直閣機宜竇山丹桂謝砌玉蘭衛女
問我諸姑曾作齊眉之偶莊姜以為已子亦求坦腹之
賢凡而汶上之田猶是奩中之物特聯星轡來衛雲輶
狀元節判正字著郎揭日貴名薄雲高誼杏花十里豈
無可娶之公卿桃葉同根但欲尋盟於姊妹不矜新進
士寧作小姨夫洗簡畧之陋風復婚姻之古禮玉鞭親
迎翟弟同歸洞房燭金榜名世間固有帝京遊鳳樓許

天下無雙即看魚軒同登龍禁東位新恩待除郎中奕
世狀元之系西江夫子之孫策對楓宸行矣家瓊之又
復袍爭草色煜然棣萼之相輝賓在秩筵主臨吉席翠
袖紅裙之歌舞瑤琴寶瑟之賡酬揮玉塵以生春飛羽
觴而轉月三魁兩娶未多前輩之風流一日九遷同享
長年之富貴某等欣逢盛事請播伶歌

洞房華褥綉芙蓉惹得天香馥正濃鳳背續絃新跨
鳳龍頭有婿又乘龍人間二月春光好魁下三台瑞

彩重酬勸不須辭爛醉詔書已下紫泥封

女筵樂語

雲英以樊夫人而婚既成絳雪玉卮乃西王母之女同
宴瑤池偉佳婿之乘龍艷華堂而式燕西位郡封秀鍾
豐水系出蘇臺姪其從姑若莊姜之已出妻之以子自
孔氏之兄來睠言騶谷之外家早識龍頭之英物自合
絲鞭之久接何遲玉鏡之重婚洞房花燭金榜掛名恰
逢盛事綉褥芙蓉門闌多喜來主嘉盟親飭魚軒俯驂

鸞馭次位宗姬銀潢衍慶玉葉分香富貴生諸王家猶
勤婦道舉動得內宮體恪奉母儀族黨稱賢閨門有則
齊姜繼晉皆由夫子以拜成姬氏如秦宜爾碩人之借
重况蘭閣乃齊年之姑嫂而棣樓又平日之師生契同
何止於四般將送遂煩於百兩狀元新聞夫人行雲態
麗詠雪思高情談謝道蘊之風妙墨衛夫人之法女科
若有亦當為天下狀元仙骨非常不肯嫁世間凡子曾
許盧魁之上第遂諧歐九之繼姻寶鑑重圓膠絃再續

小喬初嫁添羽扇之風流
京兆新粧覺蛾眉之嫵媚
東席恭人參軍令女刺史
親孫七袞開年綠鬢朱顏
之如舊九宗拜長藍袍紫
綬之盈前引領瑤姬主張
玳宴淺斟低唱恰當芍藥
正開庭更勸迭酬笑指蟠
桃同祝壽某舞慚趙女歌
遜秦娥上對芳筵僭陳斐
韻

馬前喝道狀元歸舊婿重
新此事奇駕鶴駢鸞來錦
水烹龍魚鳳宴瑤池滿斟
蕉葉融春色共指蟠桃祝
壽期後會相逢定何日玉
郎承詔入京時

禮席致語

鄒宴姚代希聖作

月娥來瑞天香新動於姚花星使遠華春意頓回于鄒
谷駐金環之壓轡開綺席以飛觴式燕又思乘龍有喜
恭惟西位親家狀僉溫襟玉粹逸調金聲為弘文學士
之孫箕裘不墜生奕世狀元之里衣鉢攸歸仁聲焯著
於一鄉義概洽聞乎九族勤厚嫁孤之意尊光送女之
行燕山主族之昏遂登諫議姑蘇有姻則助終秉政鈞
高掩前聞聳觀盛美我東位族長朝奉高年重望碩德

耆英平糶濟人為鄉閭之司命公心服衆真宗黨之主
盟深種善根力行好事未論兩家之閱閱且誇一樣之
胸襟世茲劉范之婚姻美矣東南之賓主相與醉此琉
璃鍾琥珀濃何以報之錦綉段青玉案某等叨居樂部
敢獻伶歌

月姊當年付桂香君家上第綠衣郎祇今盛事追龍
首又此佳占叶鳳凰暖律潛回燕谷冷名花盡壓洛
城芳從今不把朱陳說百世姚鄒話柄長

女筵樂語

結婚鼎族上尋姊月之歡盟送女衡門欣逐從雲之仙
隊鸞輶戾止燕席綏之恭惟西位懿德春溫清標玉潔
派松垣先生之族系久熟家傳嬋竹樓夫子之孫枝咸
推閭範慶鍾猶子禮重送門凡季蘭女職之修皆伯氏
姆儀之訓我東位里稱賢母胄出名門有女不與凡兒
會得龍頭之婿擇婦必於儒族遂諧鳳卜之緣二姓綢
繆四筵歡洽花簪王母艷瑤池玳宴之春桂近嫦娥看

綵砌藍袍之耀欣逢盛事敢獻俚辭

瑤姬來自狀元家真是姚黃第一花玳席艷開春富
貴魚軒榮駐遠光華梅梢欲動朱簷雪竹葉微潮玉
臉霞正好留連長夜飲未須催整七香車

郡守宴狀元樂語

竹州出狀元果應市河之識道院迎仙客真為珂里之
榮簾幕捲以爭看山川為之改觀一時盛事萬口歡聲
恭惟府僉狀元正字氣蓋諸公眼高四海兒童走卒皆

知雪坡之名弟子諸生幾坐春風之裏信所謂國人之
彥是宜為天下之魁千佛首題九重親擢虎榜首登鳳池
身到獨誇地位之高龍頭春重鶴髮恩深兩副君親之
望行看金甌之覆益增瑞郡之光恭惟府判華文郎中
董試有功得人報國以堂下之言知駿蔑於舉子之時
識富公望著筭篁半刺平分於風月手提衡鑑八元高
舉於雲霄故今為首唱之英即向者吹送之力而我判
府秘書寺丞胸涵星渚肩拍廬山衣鉢親傳早策楓宸

之第觚稜入夢佇回荷橐之班惟此邦文宿之加臨故
今歲魁躔之轉現氣類相感不自後不自先賓主交歡
醉言歸醉言舞共飲西湖風月相期北漢星辰笑紅綾
餅餤之曾嘗記黃甲姓名之如舊清歡卜夜暖氣排冬
成此一段風流何惜十分酩酊玉勒成行狀元過此日
親逢沙堤新築宰相行他時並命某等縻身樂部拭目
台躔輒貢俚言仰陪芳宴

幾多文士踏槐黃實出倫魁在瑞陽千古河連留地

識一聲臚唱破天荒
金釵笑擁龍頭客
寶篆濃薰燕寢香
方國薦賢蒙上賞
匪晨有詔下芝堂

雪坡集卷四十五

欽定四庫全書

雪坡集卷四十六

宋 姚勉 撰

疏語

太平興國寺再建淨土院接待榜

昔日龍舒居士王公日休勸人念阿彌陀佛早修西
方淨土謂一人念佛則彼處生一蓮花標其姓名身
後即生其上此最是誘人為善之說然世人多不之

信蓋有其故試相與言之極樂國不知有否果有之
必在西方嘗以漢書考之張騫奉使西域有所謂身
毒國注云即今天竺國佛經載釋迦如來嘗在天竺
國及舍衛國說法則佛之所在是即佛國矣漢張騫
曾到唐時三藏玄奘師往西國取經亦曾到雖曰佛
國佛則久遷化矣但其佛法存耳天竺國及舍衛國
雖與中國異亦是山川土地耳漢張騫唐玄奘初不
見有所謂蓮花及人姓名標其上亦不曾見中國有

何人死後生在彼處且張騫及玄奘之游也經歷多
少險難方到其處今中國之人在生曾遠遊者不過
千百里又遠則萬里亦有一生不曾遠遊者亦有一
生身居鄉落足不到州城府治者在生且如此則百
年以後當生極樂國不知自何門而出何路而往何
人為之指引何人與之糧食又何以能越險難借曰
善念護持菩薩接引假如有十萬百萬人念佛皆當
生淨土不知還有十萬菩薩百萬菩薩接引否盡中

國人念佛生淨土西域小國能容之否又不可云佛國之外別有淨土也何況蓮花為物中國亦有之花葉根莖甚脆而薄人何以生其上縱生其上無屋宇何以庇風雨無几席何以供坐臥此皆誕謾恍惚之說立為此說雖欲化人人亦不信縱可化愚人亦不可化達者然則無淨土乎曰有諸佛教人只要清淨心地耳心地清淨即是西方淨土樂道無憂即是極樂世界七情不染即是七寶楊枝八難不侵即是

八功德水貪愛之中頓回淡泊嗔怒之際忽放清涼
即是猛火生蓮花愁憂煩惱攝之以順乖爭凌犯處
之以和即是地獄化為天堂與人慈悲方便念念誠
恪實地修行即是黃金為城琉璃為路故曰苦海無
邊回頭是岸又何必外求極樂國也哉世之人不問
賢聖不問智愚不問老幼皆同此純粹至善之性同
此一性故皆同此理理之所在無今古無壞爛故曰
常住以理曉人人之心同之人誰不信故今日普化十

方重建太平興國寺中一淨土院以間接待不敢再以人所不信之說相勸告只以人所同信之理相勸告也淨土院舊有之南渡建炎兵火遂成廢壞淨土之院雖廢壞而淨土之名與淨土之地則未嘗廢壞也今欲復興建之不欲只作尋常應奉香火院念天下皆有接待獨吾鄉無之近年雖有欲建立者然未有成就無他斬新建立平地上起風濤不如興舊起廢之為順也接待一寺所以苦欲建立者亦無他意

但念人之常情飢則思飧倦則思息垢膩則思浣濯
假如自己出在外方跋草涉水梳風櫛雨正此勞苦
糧食且盡忽得一處號為接待不必糴而自有為之
置食者不必賃而自有為之設榻者不必歸家而自
有為之浣濯者到此地心豈不樂推己及人則人之
在外者亦如此矣故今欲復興建太平興國寺淨土
院以為此舉一可以修復破壞之處一可以普利雲
水之計吾鄉佛國人有善心將共發歡喜心而成之

矣今所欲成者乃欲建一水陸堂以為并包兼容之地建一藏殿以為運轉無窮之本緣雖大而易就事至簡而易行衆力為之不日成就今諸處建法堂建藏殿者甚衆尚皆蒙衆力喜捨況此欲濟人利物者哉人孰無是心哉或謂作善事可以求福此却不必論作善降之百祥積善之家必有余慶善與福慶是一類事作善自是有福但不必求福耳不求為功而功立則功大不求獲福而福至則福大淨土既成善

心堅固國家菩薩人人諸佛和氣薰蒸風雨調順國
泰民安公私清吉則淨土極樂國世界只在眼前不
必求之西方矣須至榜示者

右伏以西方淨土不離當處一絲毫南寺伽藍已盡河
沙千世界拈起舊時公案鼎新今日家風要敞開廣大
道場不是作尋常律院運天龍寶藏轉法輪即轉食輪
開水陸法堂無人相亦無我相普接十方雲水衆不問
四海江湖人來不拒去不追因則眠飢則食綠楊枝時

時甘露青蓮花步步人天發三菩提心脚跟下雙修福
慧飲八功德水眼孔中便放光明衆力維持一時成就
萬年不朽大地無邊壯觀重新恢復南渡建炎之氣象
皇圖仰贊輝煌太平興國之規模昭揭通衢明知此意
建淨土院疏

吾州南招提舊有淨土院太平興國中諸刹一時建
兵戈偶煨燼劫變法不變公案拈復新火裏優鉢現
今當如是觀廣大作方便中開水陸堂日日法輪轉

雲水任去來救度十方徧佛日耀萬古清風生八面
須憑歡喜捨成此廣大願人生天地間石火與迅電
及茲強健日宜作最上善各生慈悲心勿作人我見
歡然施財力成就速如箭福報當不虛愈施愈充羨
說偈恐未周更作儷語勸

右伏以一片閒田幾度賣來還自買千年公案這回拈
出又重新壯觀復興家風大振堂開水陸普資百千萬
億衆生藏湧龍宮一轉五千四十八卷成此無邊功果

是名最上福田衆大檀越維持一刹那間成就四通八達不妨舊店新開一日三餐要使飢人飽去請揮椽筆速注寶銜

太平寺內宮建法堂疏

內宮立院招提中最號清幽外護有人刹那間復新剎建締雨花之梵宇紆卷葉之回廊金雞銜粟於香積之厨玉猿獻果於法王之座密隱禪房花木靜依野圃松篁衲被都蒙自可焚香宴座竹筇來訪也能燒葉煎茶

福有所歸是當必捨

天慶觀建梓潼殿疏

居梓潼七曲之山素昭靈響司桂祿九天之籍實主榮
通在他邦皆有於行宮宜此郡欲興於盛觀惟茲新瑞
素曰蜀江既山川英秀之同乃仙聖棲遊之素用裒衆
力共建真祠就天慶觀察取自天有慶之義號文昌道
院為斯文大昌之符振作儒風主張吾道庶咸知於嚮
慕以益勵於踐修校德行校陰功有如揭日出狀元出

宰相式應連河

南道堂作雲堂疏

天道逍遙自有八景煙霞之趣人間遊戲可無十方雲
水之居開敞琳堂欣迎羽駕鼓琴敲筑招鳳喚龜煉鼎
燒丹驟驚馭鶴朗吟過玉沼高臥看青山道人瀟洒清
幽施主康寧富壽翠梁玉棟何須桂館栢臺玉鎖金龕
便是蓬萊方丈

化三官殿疏

三元考校無非摠攝於三官一念皈依自可興成於一
殿燈龕花几經卷香爐日修崇奉之儀天與康寧之福
圓成道果又何止百千萬年廣大善根不必齋正七十
月

建五雷醮疏

雷乃發聲將屆震驚之候人誰無過盍殫禱謝之誠爰
合羣資共修清醮里閭安泰民所欲天必從稼穡登豐
今以始歲其有請揮椽筆齊注寶銜

蓋飾澄江橋疏

跨虹脊於雙堤已誇偉觀甃龍鱗之萬瓦要著新功了
茲一段因緣做箇十分結果惟登茨惟丹雘如跂翼如
翬飛大手周全即時了當揮金喜助真成元凱立橋衣
錦榮歸自有相如題柱

內宮寺求僧疏

風雲借便即成變化之鯤鵬雨露沾恩須作崢嶸之龍
象全憑傳世寶為覓護身符倘蒙檀越垂慈即以比丘

得度掀翻席帽圓殿前剗草之機分付金欄結會上拈
花之笑學佛便成佛知恩必報恩振太平千載遺風做
錦江一段勝事請揮大手特注芳銜

興善院求僧疏

捨妄趨真即日脫皮換骨超凡入聖自今圓頂方袍大
檀越不吝千金小沙彌頓成三寶種果得果知恩報恩

余師姑募緣祠部疏

并序

本寺尼童妙清欲謀圓頂尚欠方兄須有富人為成

妙果謹持短疏遍扣高閤一筆周全三衣具足

禮釋伽佛子為師因比丘尼身得度欲成正覺願了良
因水到渠成花開子結定憑傳世寶為覓護身符若得
都茶場官會八百千便有文思院勅綾三四尺花生筆
底草剗殿前發歡喜心現圓滿相盡在金多長者重興
鐵磨家風

帖請瑩和尚住成覺

松楸在望可勝瞻戀之懷香火結緣盍選精虔之主乃

眷靈峰山寺舊為成覺道場昔妙光禪中之宗師實先
君方外之伴侶祐典座得為山地兩脚踢倒淨瓶兒龐
居士叅馬祖禪一口吸盡西江水風松雨檜皆談般若
雲溪月嶺普現全身生為杖屨盤礴之鄉歿作冠劍奉
藏之所立無縫塔占最高峯鹿不犯栽虎當巡境自古
佛寂滅而為樂覺此山撐住之少人魔弱成強賊來欠
打立得毗盧頂顛可無硬淨脊梁恭惟瑩公和尚苦志
修行道心堅固利刀在手要斫開荆棘叢林把茅蓋頭

便立起旃檀境界幾載精進總持之力一片慈悲供養
之心昨者不憚勤勞力開荒翳非求自利欲結衆緣大
展開我菩薩家風真踏得老和尚脚步謹扳洒掃便請
承當變近來俗漢規模切莫關門喫飯立從前道者活
計直須如地鋪心為諸天供佛齋僧為檀那種福添慧
常惺惺如貓捕鼠要防寇盜來侵獨堂堂似虎靠山休
被鬼神覷破我來廬墓山後結庵仰看雲俯聽泉許多
快活晝訪茶曉隨粥好伴清閒若夫萬象高燥地之營

一札功德林之賜罔極昊天欲報尚期異日之可為
猛辦堅心共圖勝果名垂不朽利及無邊佛法後付國
王大臣熟思印記峰寺中甲天下奇秀更著琴書象駕
入山龍神護法

為梁道士撤土

平生盃酒不隨浮世塵埃一瓣心香只為帝君殿宇如
何羽化遽爾仙遊倘非去三清境上作妙行真人即是向
七曲山中做侍香童子一靈不昧萬古長存聽我贈言

為君撒土大衆畢竟末後一句作麼生道咦九轉丹成
無星礙飄然直上蔚藍天

解道和尚出塔緣化疏

解號妙光

妙光和尚願力弘深初在藥山悟明祖意脅不沾席
二十餘年末後廬阜山前爛泥田畔遇大質禪師深
錐痛劄三際俱縱自此機鋒掣電拈出如來向上頂
門一竅接物度人發明心地者甚衆不肯出世住院
自向靈峯卓庵丙午歲偶駐錫錦江崇果院中忽於

三月七日沐浴辭衆端坐說偈而逝衆信就立塔於
崇果遺言後當出塔復歸靈峰時節到來今欲迎歸
本山建塔院立法堂崇奉香火永鎮山門仗十方之
主盟立萬世之標榜功德圓就福報無邊

伏以六祖真身亘古鎮南華法窟育王舍利至今留西
浙名山況此妙光重來古佛瀾翻舌本掣電轟雷鐵打
脊梁撐天拄地百尺竿放身捨命十字街運水搬柴大
振宗風普沾法雨孤獨園中方談般若雙林樹下忽入

涅槃直成無上菩提不比等閒坐脫雖然是不曾生也不曾死誰知道恁麼去解恁麼來石縫裂開彌勒這番重出世寶輪撥轉觀音無刹不現身曾有遺言後當出塔因緣啐啄時節到來直教今古揣揚免使兒孫覆蓋當場獨露幻身原即法王身遍界不藏非相是名真實相放光動地返本還原永鎮山門謂似龍歸大海共成勝事莫教鷄過新羅成大莊嚴是真福德

水陸孤魂榜語

人人本具無非諸佛如來念念差殊遂有天堂地獄汝
今諦受吾為敷宣諸佛子等覺性本圓善端均足只為
迷聲戀色遂皆背覺合塵貪嗔癡愛那箇能除酒色財
氣是人皆犯不敬佛法僧寶不悟幻化空身漂蕩愛河
拘纏業網一旦眼光落地神識飄風各隨所造之業因
遂致墮生於惡趣舉目是刀山劒樹更無酒肆茶坊轉
身逢馬面牛頭不見柳腰花貌動經歷劫無有出期豈
知死後三塗皆由三毒生前十惡即是十王若能悟妙

靜明心又安有虛妄惡業欲與懺滌普遂超生今遇平等
之筵普設無遮之會解冤釋結破暗開明飽汝以百味
珍羞永除飢渴濯汝以八功德水頓使清涼各宜聽法
聞經莫不回心向道衣中認寶火裏生蓮證無上佛果
菩提超有漏入天福報罪花彫落翻身跳出鬼門關心
鏡圓明舉足同遊華藏海

孤魂浴榜語

萬劫皆空本來無垢一塵不染即是真如各發三菩提

心來浴八功德水脫離苦海超出愛河放寶光於佛殿
中現真人於肉團上光燦燦露圓通妙相赤洒洒證清
淨法身忽悟本因快似跋陀尊者既無欲染便見釋迦
如來

市心重建觀音閣緣化榜語

觀音菩薩者人稱其名號或繪塑其容像隨即現身
而為說法普陀落伽旃檀紫竹不離當處常在目前
是以人天悉加崇仰四衢通透八面玲瓏晨鐘雷轟

警醒羣夢夜燈月照燭破冥途天香寶花莊嚴供養
鎮妖壓厲滅罪消災年穀豐登國土安泰功德無邊
不可思議歲在辛巳祝融扇災真如法身雖無虧損
有漏勝果悉歸太虛成毀有時興復有數重新建立
與舊奚殊今欲普化衆緣鼎創偉觀作大功德普利
四生凡在見聞悲當喜捨造此閣已復度一僧崇香
火為國焚修祈年豐稔此閣成就豈徒美觀禪衲律
僧經社道友或此習定或此誦經隨所修為種種方

便所宜捨施成就良因隨意結緣隨緣獲福證無上
道皆自此中昔有僧問一善知識如何是佛荅云於
紅塵鬧市中急著眼看去僧不會今於十字街頭重
建觀音寶閣震大法雷雨大法雨東方既明市井聞
擾歌哭笑樂忿怒喧啾車馬往來商賈貿易爭財奪
利逐色隨聲正恁麼時業識茫茫塵勞袞袞忽然舉
頭見此寶閣屹然不動六根瑩淨心地清涼如火裏
蓮如紅爐雪豈不快哉妙果無邊不可蹉過欲宣此

義榜語瀆陳

十字街頭正好修最上福萬家叢裏豈無有箇中人欲
觀音菩薩好展神通必多寶如來先開方便天飛傑閣
普鎮妖邪雷吼洪鐘盡驚醉夢各宜喜捨便要速成浮
世須臾何必去電中捉影福緣成就大家如火裏生蓮
三寶證明萬年香火

經藏院緣化建輪藏疏

三禪二十四律太平以經院居先一藏五百餘函般若

指金剛為最自大唐元和之際興論師說法感頑石點頭迨聖宋淳祐之間弼副正垂慈從定門開眼藏無樞而欲轉堂布施而可營重開香澗前霜花再整脩廊卷風葉多多益辦非由外處得來種種莊嚴皆自吾心流出是名不住相布施方稱沒童人提持點生鐵為黃金取青紫如拾芥

太平寺化緣填溝栽松疏

塞塹填坑且要一般平等深根固本直須萬古堅牢作

檀那實地工夫祝聖主齊天壽筭履平若砥欲四方皆
嚮道之民福茂如松願一世在躋仁之域

雪坡集卷四十六